

KE MANA KITA HENDAK DIBAWA...?

JEJAK DAN LANGKAH ONN DIULANGKAI

Di dalam keadaan yang ada di sekeliling kita hari ini sebagai penyedar kepada apa-apa yang harus terjadi dan harus dilakukan orang kepada kita maka adalah molek rasanya kita menyiarkan majalah yang ditulis oleh penulis majalah ini yang kita ketahui adalah ia mengambil bahagian yang besar di dalam UMNO semenjak lagi pun menjadi Yang Di-Pertua UMNO sehingga kepada saat ia menulis ini dan dengan demikian maka kita yakin segala gambaran-gambarannya terhadap kepada langkah-langkah Onn itu patut diperhati dan dipandang dengan saksama dan dihalusi dengan cermat kerana sungguhpun ia seorang sahaja tetapi dengan sifatnya telah diamanahkan oleh bangsanya memperjuangkan nasib bangsanya itu maka dengan sendirinya segala gerak langkah itu adalah sangat-sangat membawa kesan kepada orang-orang Melayu kerana pada suatu masa yang lampau ia dipandang sebagai seorang “ketua Melayu yang boleh menghitamputihkan bangsanya.” Dengan demikian tulisan yang serupa ini tidaklah ia menyentuh sahsiah oleh kerana segala gerak gerinya itu adalah berkaitan dengan kedudukan dan muslihat orang-orang Melayu yang dengan kerananya adalah membukakan halnya kepada kupasan-kupasan yang boleh mengenai orang-orang Melayu. – P. P.

KEMERDEKAAN PALSU

(Oleh Jabar)

Ada agak baiknya di sini, untuk pengetahuan pembaca-pembaca kita mengulangkaji beberapa perkara yang menurut pandangan saya dijalankan oleh Onn yang harus tersembunyi atau terselindung pada pandangan orang-orang kita. Pandangan yang saya beri atas rupa Onn yang sebenar di dalam majalah ini saya ambil dan saya petik daripada telatah-telatah siasatnya, lenggang lengkok siasatnya yang dari semasa ke semasa berubah dan akan berlagak di antara satu dengan lain dan dengan mengikuti jejak-jejak itulah majalah ini akan menjelaskan keadaan yang sebenar iaitu ia bukannya suatu rekaan yang ada-adakan sahaja.

Tiap-tiap perjalanannya dan gerak gerinya itu tidaklah dapat diberikan begitu sahaja dengan tidak dapat ulasan atau diambil pengertian daripadanya kerana walau bagaimanapun Onn itu adalah ia seorang yang telah membuat sesuatu di negeri ini yang dengan kerana langkah itu ia sekarang duduk di kemuncak yang tinggi di negeri ini yang tidak ada mengatasinya melainkan raja-raja Melayu dan Pesuruhjaya Tinggi.

Dengan tidak hendak menyembunyikan walau sedikit pun atas kebolehannya maka saya berani mengatakan bahawa Onn itu adalah diakui menjadi seorang ahli siasat Melayu yang sangat bijak. Sungguhpun begitu saya boleh mengatakan bahawa ia bukannya seorang pemimpin atau penganjur oleh kerana kenyataan-kenyataan yang terang dan nyata ada menunjukkan bahawa tidak ada sifat-sifat pemimpin bangsa dan penganjur rakyat yang ada kepadanya. Kejayaannya dengan sokongan orang-orang Melayu menumbangkan Malayan Union itu bukanlah ia suatu kejayaan penganjur yang jati tetapi kejayaan itu adalah kejayaan seorang ahli siasat yang bijak dan licin. Oleh itu perjanjian Persekutuan Tanah Melayu yang mengambil tempat perjanjian MacMichael itu jauh jiwanya dari hasrat dan kemauhan orang-orang Melayu yang masa Malayan Union dahulu telah bersungguh-sungguh mempertahankan hak dan kedudukan mereka yang telah disapu bersih oleh Treaty MacMichael itu.

Sekiranya Datuk Onn itu sebenarnya penganjur bangsa dan pemimpin rakyat Melayu tentulah ia akan nampak iaitu tidak ada masa yang lebih munasabah bagi mengisytiharkan kemerdekaan negeri ini dari masa lepas Jepun

menyerah diri sebagaimana yang telah diperbuat oleh Indonesia ataupun sekurangnya itulah sebaik-baik masa bagi mendapatkan suatu treaty dengan Inggeris yang lebih baik dari Perjanjian Persekutuan yang ada sekarang ini terutamanya pada masa itu kekuatan dan persatuan orang-orang Melayu tersangat pejal dan tiap-tiap seorang Melayu telah berhabis-habis memberi pengorbanan kerana tujuan yang satu. Tambahan atas itu semua, tawarih pergerakan kebangsaan di mana-mana pun dalam dunia ini belum pernah menunjukkan kepada kita seorang penganjur bangsa yang tulen mahu menyandang sebarang jawatan dalam negerinya yang belum merdeka, perhatikan Muhammad Ali Jinnah, Nehru, Ghandi, Sukarno dan lain-lain lagi.

Pengikut-pengikut Onn yang sangat-sangat setia kepadanya hendaklah fahamkan hakikat ini, kerana perbuatan mengikut dengan buta tuli dalam masalah-masalah kebangsaan adalah satu malapetaka besar. Yang demikian ini tidaklah bermakna saya berniat dan berkehendakkan pengikut-pengikut yang setia itu berpaling tada dari Onn malahan sekadarkan saya berkehendak mereka itu tau yang Onn itu adalah seorang yang pandai menggunakan peluang (*opportunities*) iaitu suatu sifat yang memang menjadi pakaian ahli-ahli siasat.

Seperkara lagi yang wajib disedari oleh pengikut-pengikut Onn, iaitu ucapannya di persidangan tahunan majlis Mesyuarat Agung UMNO pada bulan Ogos tahun 1951, katanya: "Malangnya mulut saya tertutup...." Adakah patut dan layak bagi seorang penganjur bangsa mengaku mulutnya tertutup berkenaan hal ehwal negerinya yang belum merdeka? Yang kita tahu dan biasa dengar serta lihat iaitu penganjur-penganjur bangsa itu mencelikkan mata rakyat yang dianjurkannya dengan memberitahu kepada mereka segala kemungkinan yang harus berlaku dan dilakukan atas negeri mereka yang belum merdeka itu. Kalau seorang penganjur menutup-nutup mulutnya dan iaitu memberitahu kepada rakyat yang dipimpinnya akan niat-niat pihak yang menjajah negeri mereka, maka penganjur itu menurut faham saya sebenarnya bukanlah "penganjur jujur" tetapi ialah seorang licin yang pandai menggunakan peluang (*opportunities*)

bagi faedah dirinya.

Daripada keterangan-keterangan yang tersebut di atas itu terpaksalah seorang itu – mau tak mau – mengambil faham bahawa Onn itu pada faham saya telah menggunakan kerana kepentingan dirinya dan apabila ia nampak bahawa UMNO tak dapat lagi menyokongnya kerana merebut peluang dan mencapai kedudukan yang lebih baik terpaksalah ia mencari lain ikhtiar bagi menjadi batu loncatannya. Saya percaya inilah agaknya yang dimaksudkan oleh gambar jenaka yang disiarkan oleh Straits Times dahulu menunjukkan Datuk Onn sedang menaikki kereta yang ditarik oleh empat ekor kuda.

Di sini saya bukanlah menuduh Onn, malahan hanyalah sebagai membentangkan faham dan pengertian saya yang harus tidak disetujui oleh pencinta-pencinta dan pengikut-pengikut Onn dan akan dipandang mereka sebagai pengertian dan faham yang salah. Tetapi memadailah yang semua pengertian saya itu, saya telah padankan dengan kejadian-kejadian di keliling diri Onn dan telatah perjuangan siasatnya.

Berkenaan dengan kemerdekaan – adakah Onn berkehendaknya? Saya sendiri tidak hendak mengiakan atau menidakkannya dan marilah saya huraiakan di sini beberapa perkara yang telah berlaku, moga-moga jawab pertanyaan itu akan didapat.

Semboyan kemerdekaan bagi negeri itu telah mula dilaungkan semenjak lepas perang ini. Pada masa itu Onn dengan kebijakkan dan pengaruh yang kuat telah mengejek-ejek tuntutan kemerdekaan itu dan ia telah berdaya upaya menutup mata ahli-ahli UMNO dari melihat perjuangan kemerdekaan yang sedang dilancarkan oleh saudara-saudara mereka di Indonesia. Sebagai natijah dari usahanya itu Onn telah digelarkan penganjur gostan. Onn telah berjaya menutup mata ahli-ahli UMNO dari memandang perjuangan saudara-saudara mereka yang di Indonesia itu. Ahli-ahli UMNO yang telah terpaksa atau dipaksa memejamkan mata itu bukanlah tak berkehendakan kemerdekaan, tetapi mereka menurut kepercayaan yang Onn itu akan membawa mereka ke tempat itu melalui jalan-jalan yang lebih selamat dari jalan yang ditempuh

oleh saudara-saudara mereka di Indonesia.

Apabila Perjanjian Persekutuan telah disahkan dengan tidak pula ia mengandungi jaminan-jaminan yang kuat lagi terang dan tidak ditetapkan di dalamnya masa bagi penyerahan kedaulatan yang penuh kepada orang-orang Melayu maka ahli-ahli UMNO telah bersabar juga menanti kalau-kalau Datuk Onn akan membuat suatu langkah berani bagi menentukan masa bila negeri-negeri ini akan menerima kedaulatannya yang penuh.

Supaya jangan sampai sesuatu rahsia itu terbuka, Onn terus mengubah keadaan UMNO dari sebuah pertubuhan gabungan kepada sebuah badan siasat yang mempunyai ahli-ahli berdaftar terus sambil ia kandungkan dalam tujuan-tujuan UMNO iaitu berkehendak menubuhkan sebuah kerajaan yang merdeka dengan adanya tujuan ini ahli-ahli UMNO sendiri bertambah percaya dan orang-orang Melayu yang dahulunya berdiri di atas pagar telah berbuat-buat masuk UMNO kerana ia sudah berani berterang-terang hendak merdeka. Tetapi setelah beberapa lama menunggu supaya tujuan itu dibuktikan oleh Onn tiba-tiba tidak ada apa-apa ia buat selain daripada sibuk memikirkan kedudukan dalam Reid dan tempatnya dalam susunan "Member System" bila tiba masanya kelak.

Onn telah melaung-laungkan iaitu "Member System" itu adalah satu kemajuan dan langkah untuk mara kehadapan menuju kepada pemerintahan sendiri. Tetapi ahli-ahli UMNO yang mempunyai pandangan-pandangan jauh telah menampak bahawa "Member System" itu lebih kepada orang Melayu tidak lebih dari suatu cara hendak mengurangkan kecerasan ahli-ahli siasat mereka yang terkemuka yang akan mendapat kerusi dalam "Member System" itu dalam lapangan siasat.

Ahli-ahli UMNO tak tersabar lagi, lalu mereka meletakkan Onn dalam ujian, iaitu dengan mendatangkan satu cadangan supaya cogan UMNO "Hidup Melayu" ditukar dengan "Merdeka". Onn telah bercakap panjang lebar atas cadangan itu dengan menumpukan bersungguh-sungguh akan hujah-hujahnya supaya cadangan itu tewas. Akhirnya apabila ia nampak yang cadangan itu sudah tetap akan lulus, ia telah membuat cubaan yang akhir lalu meminta supaya sebelum

cadangan itu dipersetujukan moleklah dihantarkan kepada tiap-tiap seorang ahli UMNO dan diminta fikirkannya. Tetapi percubaannya ini pun kecewa jua nasibnya.

Permintaan Onn supaya didapat fikiran tiap-tiap seorang ahli UMNO atas cadangan itu memanglah suatu cara demokrasi yang sebenarnya, tetapi saya hairan, kerana berkenaan dengan masalah Undang-undang Rakyat Raja ia tidak meminta begitu pada hal masalah itu jauh lebih besar ertinya dan kesannya pada orang-orang Melayu. Demikian juga berkenaan dengan masalah loteri, bukan sahaja Datuk Onn tidak bersetuju diminta fikiran tiap-tiap seorang ahli UMNO, tetapi cadangan itu telah dibawa oleh Setiausaha UMNO (atau lebih tepat anaknya) masa itu. Sekadar hendak menukar cogan kata begitu gelisahnya maka betapa pula halnya kalau umat Melayu mendesaknya menuntut kemerdekaan dan jika Inggeris berdalih diminta ia isytiharkan batalnya Treaty Federation itu.

Setelah Onn melihat yang ia tersua dengan satu hakikat yang tak dapat hendak ditudungnya, iapun gelisah dan kedudukannya dalam UMNO serba salah. Jadi apa mestinya dibuatnya supaya bayang merdeka itu hilang dari mata orang Melayu yang dalam UMNO. Di sini timbulah satu fikiran iaitu menubuhkan sebuah parti baru terbuka kepada sekalian bangsa dengan diberi hak yang sama dalam siasat, iktisad dan pergaulan. Dengan jalan ini Onn telah berjaya menarik perasaan orang Melayu dari soal kemerdekaan kepada soal bangsa-bangsa yang bukan Melayu yang hendak memperadakan hak-hak siasat orang Melayu.

Saya tiada bermaksud menuduh Onn hendak melaga-lagakan antara bangsa Melayu dengan bangsa-bangsa yang bukan Melayu. Tetapi saya percaya Onn cukup faham akan cemburu yang sedang menyala dengan maraknya hendak membakar perhubungan baik yang ada di antara penduduk-penduduk negeri ini. Oleh yang demikian itu hati saya bertanya adakah langkah Onn menubuhkan "IMP"nya itu suatu langkah yang baik bagi kemerdekaan negeri ini dan keselamatannya? Menurut pandangan

(sambungan pada muka 29)

Kalau kita selidik lebih dalam dapatlah kita ketahui bahawa perjuangan manusia dengan hawa nafsu itu adalah tiga keadaan atau kejadian:

Pertama: hawa nafsu itu terkadang-kadang dapat menakluk orang tadi, ia menguasai segenap anggotanya, hingga apa juu dan ke mana sahaja diperintah oleh nafsunya ia mengikut tak kuat membantah atau melawan lagi. Golongan ini adalah diisyaratkan Allah dalam firman-Nya yang maksudnya: ‘Tidakkah engkau fikirkan (bagaimana buruknya) orang-orang yang menjadikan Tuhan akan hawa nafsunya, dan Allah sesatkan dengan pengetahuan, dan matikan pendengaran dan hatinya, dan ia adakan tutupan pada penglihatannya? Maka bukankah tidak ada orang yang dapat memimpin dia sesudah Allah (menyesatkannya)? tidakkah kamu ingat?’

Kedua: Terkadang-kadang seseorang dapat mengalahkan hawa nafsunya dan terkadang-kadang ia dikalahkan pula oleh hawa nafsunya – bergilir-gilir; terkadang-kadang ia kalah dan terkadang-kadang, pula hawa nafsunya kalah. Supaya ia sentiasa beringat kepada hawa nafsunya itu maka Tuhan akan mengingatkan dan menyedarkan supaya jangan larai sesaat pun. Firman-Nya yang maksudnya : “Dan janganlah engkau turutkan hawa nafsu sebab ia akan menyesatkan engkau kepada jalan Allah. Sesungguhnya orang yang sesat kepada jalan Allah itu akan menerima seksa yang pedih disebabkan mereka lupa kepada hari perhitungan-Nya.”

Ketiga: orang yang sentiasa menakluk hawa nafsunya.

Orang yang begini keadaannya kebanyakkannya daripada golongan Nabi-nabi, orang-orang soleh dan orang yang berbakti bersungguh-sungguh kepada Allah. Bagi mereka yang dapat menakluk hawa nafsunya itu besar bahagianya. Mendapat kesenangan, syurga di sediakan baginya sebagaimana diterangkan dalam firman Allah maksudnya: “Dan adapun orang yang takut kepada Tuhan dan ia mengawal dirinya daripada menurut hawa nafsunya maka sesungguhnya syarak itu ialah tempat tinggalnya.”

(bersambung)

dan perhatian saya bahawa langkahnya itu ialah suatu langkah yang paling buruk yang di dalamnya akan hidup dengan suburnya dasar “pecah-pecahan dan perintah, dan kerananya harus akan tumbuh benih persengketaan dan perbalahan di antara penduduk-penduduk negeri ini yang tersusun dari berbagai-bagi kaum dan bangsa yang di dalamnya tak dapat dinafikan masing-masing menaruh cemburu yang amat dalam antara satu sama lain.

Demikianlah dahulu dan jika ada peluang, saya akan berulang menuis lagi supaya jawab pertanyaan yang di atas tadi akan didapati dengan lebih-lebih mudah dan jelas.

Apabila pemegang-pemegang negara (pemerintah) terdiri daripada orang baik-baik, orang-orang kaya terdiri daripada hartawan-hartawan yang dermawan, semua perkara selesa dengan cara permesyuaratan maka dunia ini lebih utama bagimu daripada kabur, sebaliknya pula apabila pemegang negara terdiri daripada orang yang tidak baik, orang-orang kaya bersifat bakhil, semua pekerjaan dikuasai oleh perempuan-perempuan maka kabur itu utama bagimu daripada dunia – Maksud al-Hadis

DI MEJA KITA

(1) “Rahsia Sembahyang” oleh al-Ustaz Abdul Hadi

Kamal. Kandungannya memuaskan sebagai panduan dalam ibadah yang menjadi tiang agama di terbitkan oleh “Usaha Kita” Kirab “Muhammad School” Sabak Bernam.

(2) “Muda Sama Muda” oleh Ahmad Bakhtiar

dua penggal tamat. Mengandungi contoh tauladan yang baik diterbitkan oleh “A M Rahman” Nombor 5, Bazar Tanjung Malim.

(3) Majalah “Kawalan” – huruf rumi –

diterbitkan oleh “Badan Kebajikan Polis Singapura” untuk merapatkan perhubungan di antara ahli-ahlinya – angkatan polis dan tentera selamat berkhidmat.

Atas ketiga-tiga hadiah tersebut diucapkan berbanyak-banyak

Terima kasih!